

**Ucapan Hari Malaysia Perdana Menteri Pengiktirafan Sumbangan Sarawak Kepada Negara
Bernama
16 Sept, 2013**

KUCHING, 16 Sept (Bernama) -- Kalangan pemimpin tertinggi parti komponen Barisan Nasional (BN) Sarawak dan pemimpin kerajaan negeri menyambut baik ucapan Datuk Seri Najib Tun Razak pada sambutan ulang tahun ke-50 Hari Malaysia Isnin.

Mereka menyifatkan ucapan perdana menteri sebagai pengiktirafan kepada sumbangan Sarawak dari segi sosial dan ekonomi kepada Malaysia.

Timbalan Presiden Parti Pesaka Bumiputera Bersatu (PBB) yang juga Menteri Perumahan dan Pelancongan Sarawak Datuk Amar Abang Johari Tun Openg berkata ucapan itu juga petanda kerajaan pusat mengiktiraf pelbagai program pembangunan yang sedang dan akan dilaksanakan di negeri ini.

"Ucapan perdana menteri membuktikan pemimpin di peringkat pusat mengiktiraf Sarawak, termasuk kemampuan negeri untuk terus membangun pada masa depan yang dilihat cerah dengan sokongan antara kedua-dua kepimpinan (pusat dan negeri).

"Saya percaya kerjasama erat antara kedua-dua kerajaan ini akan memberikan suasana dan semangat yang baik dalam kita membangunkan negeri," katanya.

Beliau berkata demikian kepada pemberita ketika diminta mengulas inti pati ucapan perdana menteri pada istiadat Perbarisan dan Rapat Raksasa sambutan perayaan Hari Malaysia ke-50 di Padang Merdeka di sini Isnin.

Menurut Abang Johari, ucapan penuh bersemangat perdana menteri itu juga membuktikan Sarawak berada di landasan tepat untuk terus berjaya bagi tempoh 50 tahun akan datang.

Presiden Parti Rakyat Sarawak (PRS) Tan Sri Dr James Jemut Masing berkata ucapan perdana menteri memberi penanda aras baharu kepada hubungan kerajaan persekutuan dan negeri, di samping menjanjikan pembangunan bagi negeri ini.

Beliau berkata ucapan Najib amat tepat sekali dalam mengiktiraf Sarawak sebagai sebuah daripada negeri yang menyumbang bukan saja kepada pembentukan Malaysia, tetapi juga pembangunan keseluruhan.

"Ucapan itu amat baik bagi kami (Sarawak)," kata Masing yang juga Menteri Pembangunan Tanah Sarawak.

Presiden Parti Demokratik Progresif Sarawak (SPDP) Tan Sri William Mawan Ikom berkata sambutan Hari Malaysia ke-50 hari ini jelas menggambarkan keupayaan Sarawak untuk menjayakan apa jua perancangan tanpa mengira sudut ekonomi mahupun sosial.

"Perdana menteri sangat gembira, beliau memberi galakan kepada kami, bukan setakat apa yang kami capai sekarang tetapi juga bagi masa depan yang perlu dikekalkan.

"Pada hari ini, kami berusaha menampilkan 'persembahan' yang mengingatkan tentang kejayaan kami, dilengkapi dengan kesepakatan, kepelbagaian dan keharmonian untuk mengingatkan rakyat tentang apa yang kita kecapai selama ini," kata Mawan yang juga

Menteri Pembangunan Sosial negeri.

Menteri Sumber Manusia yang juga Timbalan Presiden Parti Rakyat Bersatu Sarawak (SUPP) Datuk Richard Riot berkata hubungan rapat antara kedua-dua kerajaan membawa kestabilan politik, justeru itu, perdana menteri mengharapkan hubungan baik yang terjalin itu terus berkekalan.

"Kita (Sarawak) yakin mampu mengekalkan suasana aman damai ini yang akan turut membawa keadaan terjamin bagi perkembangan ekonomi yang baik kepada kerajaan pusat dan negeri," katanya.

-- BERNAMA

Copyright © 2013 BERNAMA

Source: <http://www.bernama.com/bernama/v7/bm/newsindex.php?id=978009>